

## REGLUGERÐ FRAMKVÆMDASTJÓRNARINNAR (ESB) 2024/2856

2025/EES/28/36

frá 12. nóvember 2024

um breytingu á I. viðauka við reglugerð Evrópuþingsins og ráðsins (EB) nr. 1334/2008 að því er varðar að taka bragðefnið bensen-1,2-díól (FL-nr. 04.029) af skrá Sambandsins (\*)

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð Evrópuþingsins og ráðsins (EB) nr. 1334/2008 frá 16. desember 2008 um bragðefni og tiltekin innihaldsefni matvæla, sem hafa bragðgefandi eiginleika, til notkunar í og á matvæli og um breytingu á reglugerð ráðsins (EBE) nr. 1601/91, reglugerðum (EB) nr. 2232/96 og (EB) nr. 110/2008 og tilskipun 2000/13/EB <sup>(1)</sup>, einkum 3. mgr. 11. gr.,

með hliðsjón af reglugerð Evrópuþingsins og ráðsins (EB) nr. 1331/2008 frá 16. desember 2008 um sameiginlega málsmeðferð við leyfisveitingu fyrir aukefni í matvælum, ensím í matvælum og bragðefni í matvælum <sup>(2)</sup>, einkum 4. mgr. 7. gr.,

og að teknu tilliti til eftirfarandi:

- 1) Í I. viðauka við reglugerð (EB) nr. 1334/2008 er sett fram skrá Sambandsins yfir bragðefni og grunnefni sem samþykkt eru til notkunar í og á matvæli og skilyrði fyrir notkun þeirra.
- 2) Með framkvæmdarreglugerð framkvæmdastjórnarinnar (ESB) nr. 872/2012 <sup>(3)</sup> var samþykkt skrá Sambandsins yfir bragðefni og var sú skrá færð inn í A-hluta I. viðauka við reglugerð (EB) nr. 1334/2008.
- 3) Uppfæra má skrána í samræmi við sameiginlegu málsmeðferðina sem um getur í 1. mgr. 3. gr. reglugerðar (EB) nr. 1331/2008, annaðhvort að frumkvæði framkvæmdastjórnarinnar eða í kjölfar umsóknar aðildarríkis eða hagsmunaaðila.
- 4) Skrá Sambandsins yfir bragðefni og grunnefni, sem mælt er fyrir um í I. viðauka við reglugerð (EB) nr. 1334/2008, inniheldur bensen-1,2-díól (FL-nr. 04.029) sem var skráð á grundvelli öryggismats vísindanefndarinnar um matvæli.
- 5) Hinn 28. september 2023 samþykkti Matvælaöryggisstofnun Evrópu (hér á eftir nefnd Matvælaöryggisstofnunin) álit um endurnýjun leyfa fyrir Zesti Smoke code 10 (SF-002) <sup>(4)</sup>, Smoke Concentrate 809045 (SF-003) <sup>(5)</sup>, SmoEz C-10 (SF-005) <sup>(6)</sup> og SmoEz Enviro-23 (SF-006) <sup>(7)</sup> sem reykbragðefni á forstigi framleiðslunnar sem innihalda bensen-1,2-díól (FL-nr. 04.029). Í álitum sínum taldi Matvælaöryggisstofnunin að bensen-1,2-díól (FL-nr. 04.029) skapaði öryggisvanda þar eð erfðaeiturhrif þess greindust í lífi við inngjöf um munn.

(\*) Þessi ESB-gerð birtist í Stjtið. ESB L, 2024/2856, 13.11.2024. Hennar var getið í ákvörðun sameiginlegu EES-nefndarinnar nr. 52/2025 frá 14. mars 2025 um breytingu á II. viðauka (Tæknilegar reglugerðir, staðlar, prófanir og vottun) við EES-samninginn (bíður birtingar).

<sup>(1)</sup> Stjtið. ESB L 354, 31.12.2008, bls. 34, ELI: <http://data.europa.eu/eli/reg/2008/1334/oj>.

<sup>(2)</sup> Stjtið. ESB L 354, 31.12.2008, bls. 1, ELI: <http://data.europa.eu/eli/reg/2008/1331/oj>.

<sup>(3)</sup> Framkvæmdarreglugerð framkvæmdastjórnarinnar (ESB) nr. 872/2012 frá 1. október 2012 um samþykkt skrárinnar yfir bragðefni, sem kveðið er á um í reglugerð Evrópuþingsins og ráðsins (EB) nr. 2232/96, og upptöku hennar í I. viðauka við reglugerð Evrópuþingsins og ráðsins (EB) nr. 1334/2008 og um niðurfellingu reglugerðar framkvæmdastjórnarinnar (EB) nr. 1565/2000 og ákvörðunar framkvæmdastjórnarinnar 1999/217/EB (Stjtið. ESB L 267, 2.10.2012, bls. 1, ELI: [http://data.europa.eu/eli/reg\\_impl/2012/872/oj](http://data.europa.eu/eli/reg_impl/2012/872/oj)).

<sup>(4)</sup> „Scientific opinion on the renewal of the authorisation of Zesti Smoke Code 10 (SF-002) as a smoke flavouring Primary Product“. *Tíðindi Matvælaöryggisstofnunar Evrópu* 2023 21 (11): 8364.

<sup>(5)</sup> „Scientific opinion on the renewal of the authorisation of Smoke Concentrate 809045 (SF-003) as a smoke flavouring Primary Product“. *Tíðindi Matvælaöryggisstofnunar Evrópu* 2023 21 (11): 8365.

<sup>(6)</sup> „Scientific opinion on the renewal of the authorisation of SmoEz C-10 (SF-005) as a smoke flavouring Primary Product“. *Tíðindi Matvælaöryggisstofnunar Evrópu* 2023 21 (11): 8367.

<sup>(7)</sup> „Scientific opinion on the renewal of the authorisation of SmoEz Enviro-23 (SF-006) as a smoke flavouring Primary Product“. *Tíðindi Matvælaöryggisstofnunar Evrópu* 2023 21 (11): 8368.

- 6) Í samræmi við a-lið 4. gr. reglugerðar (EB) nr. 1334/2008 má eingöngu setja bragðefni á markað sem, á grundvelli fyrirbyggjandi vísindalegra gagna, skapa ekki öryggisáhættu fyrir heilbrigði neytenda. Því ætti að fjarlægja bensen-1, 2-díól (FL-nr. 04.029) af skrá Sambandsins yfir bragðefni.
- 7) Því ætti að breyta reglugerð (EB) nr. 1334/2008.
- 8) Með tilliti til litillar notkunar á þessu bragðefni og í því skyni að tryggja snurðulaus umskipti frá reglunum sem voru í gildi fyrir gildistöku þessarar reglugerðar ætti að vera heimilt að setja matvæli, sem bensen-1,2-díóli (FL-nr. 04.029) hefur verið bætt í og sem hafa verið sett á markað í Sambandinu eða sem eru í umflutningi frá þriðju löndum til Sambandsins áður en þessi reglugerð tók gildi, á markað í Sambandinu til síðasta dags lágmarksgeymsluþols þeirra eða til síðasta notkunardags. Umbreytingarráðstöfunin ætti ekki að gilda um efnið sjálft og efnablöndur sem efninu hefur verið bætt í og sem eru ekki ætlaðar til neyslu sem slíkar þar eð framleiðendur matvæla, sem nota þessar efnablöndur sem innihaldsefni, þekkja samsetningu þeirra þegar þeir nota þær.
- 9) Ráðstafanirnar, sem kveðið er á um í þessari reglugerð, eru í samræmi við álit fastanefndarinnar um plöntur, dýr, matvæli og fæður.

#### SAMÞYKKT REGLUGERÐ ÞESSA:

##### *1. gr.*

#### **Breytingar á reglugerð (EB) nr. 1334/2008**

Ákvæðum I. viðauka við reglugerð (EB) nr. 1334/2008 er breytt í samræmi við viðaukann við þessa reglugerð.

##### *2. gr.*

#### **Umbreytingarráðstafanir**

1. Matvæli sem bensen-1,2-díóli (FL-nr. 04.029) hefur verið bætt í og voru sett á markað á lögmætan hátt fyrir gildistöku þessarar reglugerðar má áfram setja á markað til síðasta dags lágmarksgeymsluþols þeirra eða til síðasta notkunardags.
2. Matvæli sem eru flutt inn í Sambandið og sem bensen-1,2-díóli (FL-nr. 04.029) hefur verið bætt í má setja á markað til síðasta dags lágmarksgeymsluþols þeirra eða til síðasta notkunardags ef innflytjandi slíkra matvæla getur sýnt fram á að þau voru send frá viðkomandi þriðja landi og hafi verið í gegnumflutningi til Sambandsins áður en þessi reglugerð gengur í gildi.
3. Ákvæði 1. og 2. mgr. gilda ekki um bensen-1,2-díól og um efnablöndur sem innihalda efnið sem eru ekki ætlaðar til neyslu sem slíkar.

Að því er varðar þessa málsgrein eru „efnablöndur“ blöndur af bragðefnum eða blöndur af einu eða fleiri bragðefnum með öðrum matvælainnihaldsefnum, s.s. matvælaaukefnum, ensimum eða burðarefnum, til að auðvelda geymslu þeirra, sölu, stöðlun, þynningu eða uppleysingu.

## 3. gr.

Reglugerð þessi öðlast gildi á tuttugasta degi eftir að hún birtist í *Stjórnartíðindum Evrópusambandsins*.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Brussel 12. nóvember 2024.

*Fyrir hönd framkvæmdastjórnarinnar,*

Ursula VON DER LEYEN

*forseti.*

\_\_\_\_\_

## VIDAUKI

Í A-hluta I. viðauka við reglugerð (EB) nr. 1334/2008 fellur eftirfarandi færsla brott:

|         |                 |          |  |     |  |  |  |          |
|---------|-----------------|----------|--|-----|--|--|--|----------|
| „04.029 | Bensen-1,2-díól | 120-80-9 |  | 680 |  |  |  | SCF/CoE“ |
|---------|-----------------|----------|--|-----|--|--|--|----------|